

“Mi ta djis cumpli cu mi deber”

STA. CRUZ -- Su faam ta Lampe. Su nombrenan oficial ta Armando Rudolfo. Su nomber di escritor ta Armando Lampe, p'esey na America Latina, na unda mas el'a publica, e ta conoci como Armando. Den comunidad di Aruba e ta mas conoci como Pader Lampe. El'a nace na Aruba, kier meen na prome lugar e ta Arubiano, ta despues el'a bira sacerdote catolico. Aruba a haya su status aparte na 1986 y na mesun aña dia 22 di Maart el'a keda ordena sacerdote den parokia di Sta. Cruz, unda el'a ricibi Bautismo, Prome Santa Comunión, Confirmación y unda el a sirbi misa como hoben. Na mesun tempo cu a surgi un pais nobo den Reino Hulandes, un Arubiano a bira sacerdote despues di hopi aña cu Aruba no a conoce un sacerdote yiu di tera. For di e momento cu el'a keda ordena sacerdote, el'a scoge pa e modelo Paulino. Kico esey ta significa? Pablo di Tarso tabata traha tent y bende esaki pa por mantene su mes y den su tempo liber e tabata predica e evangelio. Durante mas di 20 aña cu e ta sacerdote el'a purba di biba e modelo aki. Kier meen semper e tin un trabao secular of yam'e mundano di cua e ta haya un salario y di esey e ta biba. Den su tempo liber e ta haci trabao pastoral den un parokia. Mayoria di sacerdote sin embargo ta scoge pa e modelo petrino (di Pedro), esta nan ta wordo paga pa nan trabao pastoral. Ora el'a bira parlamentario esaki no tabata un ruptura cu su forma di biba su sacerdocio. El'a mir'e como un trabao mundano cu ta dune un salario, manera e tabata traha prome na un school publico (Instituto Pedagogico Arubano) cu tabata dune un salario. Toch tin hende no ta comprende ainda su escogencia pa haci e trabao di parlamentario. E dificultad ta sinta tambe

den e hecho cu e mester a scoge entre sigui funciona como sacerdote of traha como parlamentario. El'a scoge pa sigui den politica, mientras cu tin catolico cu lo a prefera cu lo el'a scoge pa sigui eherce e sacerdocio. Algun hasta a expresa cu el a traiciona Dios. E ta cumpliendo mitad siglo di bida, y a nace na 1958. For di su humilde casita den cunucu e ta waak bek y ta reflexiona riba su bida. Lo e no molestia e lector cu detayes di su infancia, di su hubentud y di su bida adulto. Aunque tin detayes curioso, manera e tabata cana cu cabey largo ora e tabata studia na Colegio Arubano, y cu bril al estilo di John Lennon. Tampoco lo e molestia e lector cu tur e detaye di su estudionan. Despues cu el'a termina VWO na 1976 el'a sigui su estudio di teologia na Katholieke Universiteit Nijmegen, unda el'a gradua como doctorandus den teologia (cum laude). Despues el'a studia sociologia y a obtene su master's degree den sociologia na Universidad Iberoamericana (cum laude). El'a termina e programa di doctorado den estudionan Latinoamericano na Universidad Nacional di Mexico y el'a culmina e ciclo aki na 1988 ora el'a ricibi su grado di doctor den ciencia social na Vrije Universiteit Amsterdam. Su carera academico a caba abruptamente ora cu e defunto Mons. Wim Ellis a manda yame na 1998 pa bin traha na Aruba y defende nos schoolnan Catolico. Despues di un ausencia di hopi aña, el'a bin bek na Aruba, su isla natal. E mester a cumpli na 1999 ainda cu su ultimo compromisonan academico na Alemania y for di 2000 e tabata full time na Aruba. E tabata yuda na Parokia di Santa Ana, na Noord. Hopi cos a pasa cu ne aki na Aruba, pero lo e spar e lector tur detaye. Lo e no conta

con el a cai sera na KIA na December 2000, ni tampoco lo e relata e huicio cu el'a enfrenta na 2001, acusa falsamente di a comete e delito di “opruiing”. Tur e detayenan aki por ta sensacionalista, pero e curiosidadnan aki di su bida poco ta yuda e lector comprende ken e ta. Den e boeki aki lo e no conta kico el'a haci, sino mas bien pakico el'a haci loke

e tabata tin cu haci. Hopi ta haci e pregunta, pakico un sacerdote a scoge pa bay den politica. Kico ta e motivacion tras di su hechonan? Cual ta e valornan cu tabata y ta guia su actonan. E ta spera cu e lector despues di lesa e boeki ta comprende mihor cu no tin contradicción entre su escogencia di e tempo ey pa bira sacerdote y su decision awor pa ta parlamentario.

Armando (Rudy, Pader Lampe) lo ta na Van Dorp Book & Office Dakota, Diasabra dia 6 di September di 11'00 a.m te cu 1.00 p.m pa introduce su boeki “Mi ta djis cumpli cu mi deber”, na esnan interesa y firma esaki tambe pa esnan cu ta desea esaki.

Armando (Rudy) Lampe



ARUBA TOURISM AUTHORITY TA BUSCANDO TALENTONAN PA
FILMACION DI PROMOCION PA ARUBA

Personanan cu e siguiente caracteristicanan:

- Muher / Homber (tur edad y haltura)
- Muchanan (4-6 anja)
- Chefnan
- Bartender / Waiter
- Reporteronan di noticia
- Trahadornan di gobierno
- Agentenan Policial
- Persona Masculino (cu tin un burico)
- Water Sport (Windsurfer/ Kitesurfer ect.)
- Massage Therapists
- Guitaristanan

Casting lo tuma lugar: E siman di September 8, 2008
Filmacion lo tuma lugar siman di September 24-27, 2008

Personanan interesa por manda informacion na
arubacasting08@yahoo.com / v.habibe@aruba.com

Funcion

Number di telefon

E-mail y potret

For more information contact Valery, Melonie or Maya:

Tel: 582-3777 (despues di September 8, 2008)

E-mail: arubacasting08@yahoo.com